



Komunikadu Imprensa

Periodu: Janeiro 2011

Edisaun : 31 Janeiro 2011

JSMP Hala'o Treinamentu Iha Sub-Distritu Laclubar

Iha lora 26 Janeiro 2011, Judicial System Monitoring Programme (JSMP) liu husi Unidade Victim Support Service (VSS) hala'o treinamentu ba autoridade komunitaria iha Suco Orlalan, Sub Distrito Laclubar, Distrito Manatuto. Partisipantes sira ne'ebé mak partisipa iha treinamentu ne'e hamutuk ema nain 25, kompostu husi representante fetu nain 4 , xefe suco nain 3, xefe aldeia nain 9, ajente PNTL nain rua 2, joven fetu nain 2 inklui komidade nain 6.

Materia ne'ebé mak aprejenta iha treinamentu ne'e mak hanesan Kódigu Penál no Kódigu Prosesu Penál husi perspetiva vítima ka perspetiva violénsia bazeia ba jéneru. Aleinde materia sira refere iha leten, treinamentu ne'e inklui mos Dekreitu Lei 7/2010 konabá Lei Kontra Violénsia Doméstika, nomos Dekreitu Lei no 3/2009 konabá Autoridade komunitaria, kna'ar ka funsaun autoridade judisiál (Juiz, Prukorador) no ajente prosesual (Polisia, Defensór Públiku no Advogado).

Diretór Ezekutivu JSMP, Luis de Oliveira Sampaio, hateten katak, treinamentu ne'ebé JSMP hala'o ba autoridade komunitaria ho objetivu; atu hasa'e koñesimentu ba autoridade komunitaria konabá prosesu legal ba kazu violénsia bázeia ba jéneru, liu-liu Lei Kontra Violénsia Doméstika ne'ebé foin tama ona vigor iha tinan 2010 nia laran. Nune'e mos, treinamentu ne'e nu'udar meus ida atu kontribui hodi bele redus ka hamenus siklu numeru violénsia bázeia ba jéneru ne'ebé maka as iha fatin refere.

JSMP observa katak treinamentu ne'e hetan antusiasmu makás husi partisipantes sira, tanbá treinamentu refere foin dahuluk sira hetan. Ho ida ne'e sira rekomenda atu aktividade hanesan ne'e JSMP liu husi Unidade Victim support Service ka VSS tenke continua nafatin ba suco seluk, liu-liu iha area rurais ne'ebé mak defisil atu asesu ba iha informasaun no prosesu lejislativa inklui Lei Kontra Violénsia Doméstika. Tuir komidade sira hanoin katak presiza sosializasaun makás tanbá kazu hirak ne'e mosu hetan influensia husi kustumi/kultura ne'ebé maka moris iha komidade nia laran.

Equipa VSS ne'ebé organiza no fasilita treinamentu ne'e observa katak koñesimentu husi autoridade komunitaria ba prosesu lejislativa em jeral no liu-liu prosesu atendentu violénsia bazeia ba jeneru minimu teb-tebes. Tanbá ne'e JSMP hein katak sei iha possibilidade liu husi apoiu husi doadores sira atu continua hala'o treinamentu iha area rurais sira.

Treinamentu ne'e realiza hetan tulun finaseiru husi USAID atraves husi koperasaun ho Fundasaun Azia iha Timor Leste. Treinamentu hanesan sei kintinua realiza iha distritu seluk ne'ebé siklus violensia ne'ebé sae makás.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Email; Luis@jsmp.minihub.org

Landline; 3323883/7295795